


www.BibleForChildren.org


Mateo 8



Chjep majquiztan tsjii zalz pjizta želatcha Caná
wajtquin, Galilea yokquin. Jesusiz' maa nicju želatcha.
Nizaza Jesusaqui niiz' tjaajinta zöñinacz'tanpacha nii
zalz pjiztiquiz kjawžtatacha.




Jalla nuz' pjijzta paan vino upzitach'a. Jalla
nekztanaqui Jesusiz' maaqui niizquiz cjichincha:
—Vino upzicha. Pero naaqui nekz atintiñi
sirwizunaczquiz cjichincha: —Tiiz' mantitacama
anchucz' paaquicha.



Nekztan Jesusaqui nii pjizta paañi
sirwizunaczquiz mantichicha, tuz' cjican:
—Tii luuznacquiz anchucqui kjaz
chjipznaquicha. Nekztanaqui luuz
joracama kjaznaca chjipzicha.



Jalla nekztanaqui Jesusaqui cjichicha:
—Jaziqui tsjii zkoluculla coozña. Nekztan
pjiizta paañi patrunzquiz chjicha. Jalla
nuž' niiz' chiitacama chjitchicha.



Nii pjizta paañi patrunaqui mallzicha nii kjazquiztan
vino tucchi. Jakziquiztan tjonchi nii vino, jalla nii ana
zizatcha. Sirwizunacakaz
zizatcha. Ninacaz kjazqui
cootkalcha. Jalla nuz' nii
vino mallz'cu pjizta
paañi patrunaqui nii
zalzñi tjowa kjawzicha.



Nekztan tuž' cjichicha: —Chjul zöñimi zuma vino panž'
tjaacha primiraqui. Nekztan kjawžta zöñinacaz' zuma
vino lictan nii jaru ana zuti
zuma vino zakaz tjaacha.
Amzti tii oracama tii
ancha zuma vino
čhjojcham,
čkjaztatajo?



Jalla niitacha Jesusaz' primer paata
milajruqui. Caná de Galilea wajtquiz
paachicha. Jesusaqui nii
milajru paacan, niiz'
arajpach kamañami azimi
tjeezicha.





Jalla niztiquiztan niiztan chica
ojklayñi zöñinacaqui niizquizimi
tjapa kuz cjissicha,
nizäza criichicha.




Nekztanaqui Jesusaqui Pedruz' kjuya
ojkchicha. Jalla nicju ajpzquiz Pedruz'
ajmuz' maa cherchicha ch'ujlñi
conz'tan laa cjichi.




Naazä kjara lanzinchicha. Nuz' lanztiquiztan nii
ch'ujlñi conquiztan zëjtchincha. Nii orapacha zäaz'cu,
ninaca atinti kallantichincha.



Nekztanaqui nii zez tjuñiz kattan Jesusizquiz tjapa
laaquichi zöñinacami, nizäza zajraz tanta zöñinacami
zijctatacha. Nizäza
Jesusaz alujta kjuy
zanaran tjapa nii
wajtchiz zöñinacaqui
ajczicha.



Nekztanaqui Jesusaqui tchapaman laa zöñi
chjetinchicha. Zöñinaczquiztan muzpa zajranaca
chjatkatchicha. Zajranacaqui Jesusa pajchicha; pero
Jesusaqui ana chiikatchicha.



Jesucristuqui chjetinz azziztacha. Nizäza Jesusaqui
tjapa nii zëjlñi laanaca chjetinchicha niiz' aztan.
Tjappacha laa zöñinacaqui Jesusa lanz pecatcha,
chjetinta cjisjapa.



Nuž tjaajnan, pakpaltan zöñinaca tjonchicha, tsjii
zuch zöñi kuzi.



Muzpa zöñi ajcziž cjen, Jesusizquin
ana macjati atchicha. Nekztanaqui
tsewctan kjuya pjetzcu,
pjetquiztan zuch zöñi
kjuylichuc
chjijunzquichicha,
niiz tjaiz
zquitquiziqui.



Ninacaqui Jesucristuzquin tjapa kuztan tjonchicha.
Nii nayzcu, Jesusaqui zuch
zõñzquiz paljaychicha,
tuz' cjican: —Jilala.
Jaziqui am ujnaca
pertuntacha.
Nekztanaqui zuch
zõñzquiz cjichicha:
—Amquiz cjiwcha,
tsijtsna. Am tjajz
zquitinaca aptaza.
Oka am kjuya. —Nuz'
cjican chiichicha
Jesusaqui.




Jalla nuž' chiyžcu Jesusaqui warcuquiz luzzicha. Niiz'
tjaajinta zöñinacaqui luzzizakazza.
Ninacaz' kotquiz okan, tjamiqui
walja tjamchicha. Jalla nuž'
tjaman kjaz ljojkiqi
warcu tjatanz pecatcha.
Jesusazti tjajatcha.



Jesusaqui kjaazicha, tuž cjican: —čKjaztiquiztan anchucqui ancha tsuctsucjo? Anchucqui anacha wejtquin tjapa kuzziz. Jalla nekztan Jesusaqui zaažcu, tjamimi kjaz ljojкими użicha. Jalla nuž chiitiquiztan tjamimi kjaz ljojкими apaltichicha. Nii apaltiņi cheržcu niiztan ojklayņi zöñinacaqui ispantichicha, nizaza

tuž cjichicha: —čChjul zöñit teejo? Tjamimi tii kot kjaz ljojkimiz tiiz chiita takukaz cazla.



Yooz Ejpqui tii muntuquiz zëjlñi
zöñinaczquiz ancha okzquichipanča.
Jalla niztiquiztan niiz zinta Majch
cuchanzquichicha, zöñinaczquiz ew
kamañchiz cjiskatzjapa.



Jakziltat niiz̄ zinta Majchquiz
criyachaja, ew kamañchiz cjequicha
Yooztan wiñaya kamzjapa ana
infiernuquin sufrajo.



Romanos 3:23 Tjapa zöñinacaqui tsjii pariju ujchizza.
Jalla nizta ujchiz cjenacui Yoozqui ana jeczquizimi
honorchiz cjiskatasacha.

Romanos 6:23 Jakziltat anazum uj paañi kamañquiz
kamchaja, jalla niiqui Yooziz castictaz cjistancha. Nuz
waquizicha. Pero Yoozqui zöñinacztaajapa tsjii pajk
favora paachicha, zöñinacaz ana waquizan. Nuzukaz
paachicha niiz zuma okzñi kuzziz cjen. Jaziqui jakziltat
Yooziz liwriita cjechaja, jalla niiqui Jesucristo Jiliriz
cjen Yooztan wiñayaz kamaquicha.

Hebreos 9:27 Tjapa zöñinacaqui tsjii wilita ticstancha tii
yokquiz. Jalla nekztan pjalzta cjequicha, Yooz yujcquiz
zuma, anazuma, nii.



Efesios 2:8,9 Yooz okzñi kuzziz cjen, nizäza anchucaz' Jesucristuzquin kuz tjaachiz' cjen, anchucqui liwriitacha. Jalla nii liwriitaqui anacha anchucaz' cjenalui. Antiz Yooz cjenpankazza nii liwriitaqui. Jalla niicha anchucaquiz liwriiz tjaachiqui. Anchucaz' paata obranacquiztan nii liwriizqui anaz' tjoncha. Jalla niztiquiztan anaz' jecmi mit kuzziz cjesacha.

Romanos 10:9,10 Anchucqui ticlarstancha, Jiliripancha Jesucristuqui, cjicanaqui. Nizäza anchuca kuzquiz criistancha, Yoozqui Jesucristo ticziquiztan jacatatchicha, jalla nii. Jalla nekztan liwriita cjequicha. Zoñinacaqui tjapa kuztan criistancha, nekztan Yooz yujcquiz zuma cjequicha, ana ujchiz. Nizäza persun tawkz'tan "Jesucristuzquiz kuz tjaa-ucha" cjican ticlarstancha, nekztan liwriita cjequicha.



Juan 3:16,17 Yooz Ejpqui tii muntuquiz zëjlñi zöñinaczquiz ancha okzquichipancha. Jalla niztiquiztan niiz zinta Majch cuchanzquichicha, zöñinaczquiz ew kamañchiz cjiskatzjapa. Jakziltat niiz zinta Majchquiz criyachaja, ew kamañchiz cjequicha Yooztan wiñaya kamzjapa ana infiernuquin sufrajo. Yooz Ejpqui niiz Majch tii muntuquiz cuchanzquichicha. Niiz cjen zöñinaca liwriita cjesacha infiernuquin ana casticta cjisjapa.

1 Juan 5:11-13 Nizäza Yoozqui cjicha: —Wejt Majchqui anchuca ujquiztan ticzicha. Jalla nekztan anchucqui wejttan wiñaya kamaquicha, wali cuntintu. Jakziltat Yooz Majchtan tsjii kuzziz kamchaja, jalla niiqui Yooztan wiñaya kamaquicha. Nizäza jakziltat Yooz Majchtan ana tsjii kuzziz kamchaja, jalla niiqui Yooztan ana wiñaya kamasacha. Anchucqui Yooz Majchquin criicha tjapa kuztan. Jalla nekztan Yooztan wiñaya kamaquicha, wali cuntintu. Nii zizjapa, anchucaquin cjijrzcuha wejrqui.



Mateo 8-9; Marcos 1-2, 4; Lucas 4, 8; Juan 2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: E. Frischbutter; Sarah S.

Chipaya Bible (cap) © 2009, Wycliffe Bible Translators,
Inc. All rights reserved.

<https://live.bible.is/bible/CAPSBB/MAT/1>

©2026 Bible for Children, Inc.

www.M1914.org

www.bibleforchildren.org

